

Aningaasarsianit akileraarutit pillugit paasissutissanik akileraaruseriffimmut nalunaaruteqartarneq pillugu Namminersornerullutik Oqartussat nalunaarutaat

Akileraaruserinermik ingerlatsineq pillugu Inatsisartut inatsisaanni nr. 11, 2. november 2006-imeersumi § 33, § 35, § 36, imm. 2, § 37, imm. 2, § 38, § 39, imm. 3, § 56, imm. 1, aamma § 83 naapertorlugit aalajangersarneqarput:

Aningaasarsiat A-t pillugit paasissutissiineq

§ 1. Akileraaruserinermik ingerlatsineq pillugu Inatsisartut inatsisaanni §§-it 30-imiit 32-mut naapertorlugit paasissutissiinermi, paasissutissiisussaataasut akileraaruseriffiup immersugassiatut sanaavi atussavaat (akissarsianik, pensioninik il.il. nalunaarutiginninnerit, akissarsianut allagartat tunisallu pillugit paasissutissiissutit).

Imm. 2. Akileraaruseriffiup paasissutissiisussaataasut imm. 1-imi taaneqartunik paasissutissanik digitalinngorlugit tunniussinissaanut akuerisinnaavaa. Akileraaruseriffiup akuersissummi paasissutissanik piumasaqaatit annikinnerulersissinnaavai aammalu pitsaassusissaannut, ilusissaannut, paasissutissallu qanoq inissitsiterneqarnissaannut allatigullu paasissutissanik suliarinninnissamut pingaaruteqartunik piumasaqaatit akileraaruseriffiup aalajangersarsinnaallugit.

Kontonik ingerlatsisuusut nalunaarutaat

§ 2. Aningaaseriviit, sparekassit, andelskassit, aningaasanik nioqqutillit, vekselinik nioqqutillit, eqqartuussissuserisut allallu, aningaasanik erniortitassanik tiguisartut, akileraarusigaanissamut atugassanik ukiut tamaasa namminneerlutik ukiup siuliani erniat tunniunneqartut imaluunniit pisassanngortinneqartut allatulluunniit kontoqartunut ataasiakkaanut iluanaarutigigitat annertussusaat pillugit, ernialiinerup ulluanik il.il. aammalu aningaasat uninngasuutit ukiup siuliata naanerani amerlassusiinik paasissutissanik akileraaruseriffimmut tunniussisassapput. Akileraaruseriffiup aalajangersinnaavaa allanit, ingerlatsinerminnut atatillugu inuit allat aningaasaataannik erniaqartitsisunit, paasissutissanik taamaattunik tunniussineqassasoq.

Imm. 2. Akileraaruseriffiup aalajangissavaa imm. 1 naapertorlugu nalunaaruteqarnerit qanoq ililluni tunniunneqartassanersut, tamatumani kontop qanoq ittuuneranik, kontoqartup aqqanik, najugaanik aammalu inuttut normuanik, suliffeqarfiup ilisarnaataanik normumik (GER-nr.) suliffeqarfittut ingerlatsiviup normuanik (CVR-nr.) imaluunniit inuussutissarsiummik ingerlatsiviup normuanik (SE-nr.). Akileraaruseriffiup kontonik pigisaqartunut, inuttut normoqaratillu ingerlatsivittut normoqanngitsut

pillugit nalunaaruteqarnermi erseqqinnerusumik najoqqutassat aalajangersinnaavai

Imm. 3. Paasissutissiisussaatitaanermi aamma pineqarput kontut il.il. ukiup ingerlanerani atorunnaarsimasut. Kontunut taamaattunut tunngatillugu atorunnaarsitsinermi uninngasuutit amerlassusii nalunaarutigineqassapput.

Imm. 4. Pisariillisaataatillugu paasissutissallu pineqartut akileraarutinik nakkutilliinermut pingaaruteqarpiangikkaangata, akileraaruseriffiup imm. 1 aamma 2 naapertorlugit inunnut ataasiakkaanut imaluunniit paasissutissiisussaatitaasut qassiikkaanut imaluunniit kontonut assigiinngitsunut ataasiakkaanut tunngatillugu atuukkunnaartissinnaavaa annikinnerulersillugilluunniit, taamatullu aamma akileraaruseriffiup aningaasat nalunaarutigineqartussaaf ikinnerpaaffissaat pillugu aalajangersaasinnaalluni.

Imm. 5. Paasissutissiisussaatitaasup kontomik pigisaqartumut aningaasat nalunaarutigineqartut amerlassusaannik nalunaaruteqarnermik ilisimatissavaa. Kontomik pigisaqartumut ilisimatitsissuteqarneq pissaaq kingusinnerpaamik ukiup paasissutissiissutitut attuumassuteqartup tulliani febuaarip aallaqqaataani.

§ 3. Kinaluunniit ingerlatsinerminut atatillugu erniaqartitsilluni aningaasanik taarsigassarsisitsisartoq taarsigassanilluunniit isumagisaqartartoq, akileraarusigaanissamut atugassanik ukiut tamaasa namminneerlutik tamanna pillugu akileraaruseriffimmut nalunaaruteqartassaaq.

Imm. 2. Nalunaaruteqarneq taarsigassarsitinneqartup kinaaneranut paasissutissanik, paasissutissanillu kontomut taarsigassarsinermullu pissutsit attuumassuteqartut pillugit paasissutissiissutitik imaqaassaaq. Aningaasanut taarsigassarsianut ataasiakkaanut tunngatillugu oqaatigineqassapput:

- 1) taarsigassarsinerup qanoq ittuunera,
- 2) ernialiutat imaluunniit erniat akiligassanngorsimasut,
- 3) taarsigassarsinermut atatillugu ernianik nalunaaqutsiineq, qaammatisiutit malillugit ukiup nalunaaruteqaataasup siuliani ernaliussanik akiligassanngoreersunik akiliuteqarsimannginnermi, tamatumunnga nalunaaruteqartussaattilluni,
- 4) taarsigassarsinermut atatillugu ernianik nalunaaqutsiineq, qaammatisiutit malillugit ukiumi nalunaaruteqaataasumi taarsigassarsianik akiligassaajunnaarsitsisoqarsimatillugu tamatumunnga nalunaaruteqartussaattilluni, imaluunniit ukiuni siuliinut tunngatillugu,
- 5) sullissinermut matussutissatut ingerlaavartumik ernialiuttakkat il.il.,
- 6) sillimatisaanut aningaasaateqarfimmut allaffissornermullu akiliutit,
- 7) realkreditinstitutsit sillimatisaanut aningaasaateqarfinit akileraarutaasussanik agguasinersiat amerlassusii, agguagarsiat tiguisumit ukiumi tunniussiffiusumi isertitatut naatsorsuutigineqartussaattillugit,
- 8) ulloq ernialiiffiusoq,
- 9) 31. decemberimi akiitsut, aamma
- 10) akiitsut 31. decemberimi nalingat, taarsigassarsiat aningaasanut nioqquteqarfimmi nalunaarsukkanik obligationinik tunngaveqartumik taarsigassarsiaappata.

Imm. 3. Pisariillisaataatillugu paasissutissallu pineqartut akileraarutinik nakkutilliinermut pingaaruteqarpiangikkaangata, akileraaruseriffiup nalunaaruteqarnissamut paasissutissiisussaatitaaneq atuukkunnaartissinnaavaa annikinnerulersillugilluunniit.

Imm. 4. Atukkiussanut tunngatillugu akiliuteqarnerit § 4 naapertorlugu paasissutissiisussaatitaasumit ingerlanneqarpata, imm. 1 naapertorlugu nalunaaruteqarnissamut pisussaaffik atuutinngilaq.

§ 4. Aningaaseriviit, sparekassit, andelskassit, aningaasanik nioqqutillit, vekselinik nioqqutillit, eqqartuussissuserisut allallu, inuussutissarsiummik ingerlatsinerminnut atatillugu illuutinik qularnaveqqusiussaarluni taarsigassarsinermi allagartanik nakkutigisassaminnik sillimmatinik paarisassanik tigusaqartarunik, akileraarusiganissamut atugassanik paasissutissanik imm. 2-mi taaneqartunik ukiut tamaasa namminneerlutik akileraaruseriffimmut nalunaaruteqassapput.

Imm. 2. Nalunaaruteqarneq taarsigassarsitinneqartup sillimmatinillu pigisaqartup kikkunerinut paasissutissanik aammalu taarsigassarsinermut tunngasunik paasissutissanik imaqassaaq. Taarsigassarsitinneqartunut sillimmatinillu pigisaqartunut ataasiakkaanut tunngatillugu oqaatigineqassapput:

- 1) ernialiutat imaluunniit erniat akiligassanngorsimasut,
- 2) taarsigassarsinermut atatillugu ernianik nalunaaqutsiineq, qaammatisiutit malillugit ukiumi nalunaaruteqaataasumi taarsigassarsianik akiligassaajunnaarsitsisoqarsimatillugu tamatumunnga nalunaaruteqartussaattilluni, imaluunniit ukiuni siuliinut tunngatillugu,
- 3) 31. decemberimi akiitsut sinneri aamma
- 4) akiitsut 31. decemberimi sinnerisa nalingat, imm. 3 naapertorlugu akileraaruseriffimmit aalajangerneqartut.

Imm. 3. Pisariillisaataatillugu paasissutissallu pineqartut akileraarutinik nakkutilliinermut pingaaruteqarpiannigikkaangata, akileraaruseriffup nalunaaruteqarnissamut paasissutissiisussaataaneq atuukkunnaartissinnaavaa annikinnerulersilluguluunniit.

Kontomik pigisaqartut Kalaallit Nunaanni najuisuusut imaluunniit najugaqartuusut

§ 5. Kontomik, akileraaruserinermik ingerlatsineq pillugu Inatsisartut inatsisaanni § 36, imm. 1-mi oqaatigineqartutut pilersitsisoq, paasissutissat tunniunneqartut eqqortuuneri uppersaateqarfigissavai, kontomik ingerlatsisuusumut pas-imik, inuup normuanut uppersaammik allamilluunniit pisortanik kinaassutsumut uppersaateqarnermut attuumassuteqartumit pisuusumit takutitsinikkut. Inuup normua, GER-nr. imaluunniit SE-nr.-nut tunngasunik, akileraaruserinermik ingerlatsineq pillugu Inatsisartut inatsisaanni § 37, imm. 1-mi oqaatigineqartutut, paasissutissanik paasissutissiinermut atatillugu, kontomik pigisaqartup aqqanik najugaanillu paasissutissiissutinik tunniussineqassaaq.

Imm. 2. kontomik pilersitsisoqarsinnaangilaq kontomik pilersitsiniartup imm. 1-mi taaneqartunik paasissutissanik nalunaaruteqareertinnagu.

Imm. 3. Paasissutissat imm. 1-mi taaneqartut kontomik pigisaqartup kinaaneranik paasinninnissamut pisariaqartut allanngorpata, kontomik pigisaqartup kontomik ingerlatsisumut paasissutissiisussaataasumut qaammat ataaseq qaangiutsinnagu allannguuteqarneq pillugu nalunaarfigissavaa.

Imm. 4. Piginneqatigiiffinnut, peqatigiiffinnut, legatinut allanullu kontomik pigisaqartuusunut inuup normuanik, GER-nr. CVR-nr. imaluunniit SE-normumik pigisaqanngitsunut tunngatillugu, siulittaasup inuttut normua imaluunniit inuup allap kontomik pigisaqartoq sinnerlugu iliuuseqarsinnaasup inuup normuanik nalunaartoqassaaq.

Kontomik pigisaqartut Kalaallit Nunaata avataani najuisuusut imaluunniit najugaqartut

§ 6. Kontonut akileraaruserinermik ingerlatsineq pillugu Inatsisartut inatsisaanni § 36, imm. 1-mi taaneqartunut inunniit, piginneqatigiiffinnit peqatigiiffinnillu il.il., Kalaallit Nunaata avataani

najugaqartunit najuisuusunilluunniit imaluunniit qaammatit pingasut sinnerlugit Kalaallit Nunaanniissimangitsunit pigineqartunut tunngatillugu, inuup normua, GER-nr. imaluunniit SE-nr. oqaatigineqassaaq aatsaat kontomik pigisaqartoq normumik taamaattumik tunineqarsimatillugu. Tamatumalu saniatigut kontomik pigisaqartup aqqa, najugaa nunalu angerlarsimaffigisaa oqaatigineqassapput.

Soraarnerussutisianut tunngasunik nalunaaruteqarnerit

§ 7. Soraarnerussutisiaqalernissamut aningaasaateqarfii, soraarnerussutisiatigut inuuner-mullu sillimmasiissutitigut aaqqissuussinernut selskabit allallu soraarnerussutisianik ingerlaavartumik inuuneq naallugu sillimmasiissutitik tunniussisartut, ukiut tamaasa namminneerlutik akileraaruseriffimmit piumaffigineqaaqaratik, Akileraaruserinermik ingerlatsineq pillugu Inatsisartut inatsisaanni § 39, imm. 1 aamma 2-imi taaneqartutuut, akileraaru-seriffimmut paasissutissiisassapput aamma soraarnerussutisiamut aaqqissuussinermut pigisaqartup kinaaneranik paasinninnissamut pisariaqartut pillugit paasissutissiinerit ilanngullugit.

Imm. 2. Kinaluunniit soraarnerussutisiassanik aaqqissuussinermik, aningaasarsianit akileraarutit pillugit Inatsisartut inatsisaanni §§-it 39 aamma 40 naapertorlugit taasanik pilersitsisoq, paasissutissiisussaataasunut aaqqissuussinermut pigisaqartup (kontomik piginnittup) kinaaneranik paasinninnissamut pisariaqartut pillugit paasissutissiisaaq, tamatumani inuup normua nalunaaruteqartussaannerit atuutsitsinissamut pisariaqartinneqartut, aammalu paasissutissat tunniunneqartut eqqortuuneri uppersaateqarfigineri ilanngullugit.

Imm. 3. Soraarnerussutisiassanut aaqqissuussinermik pilersitsisoqarsinnaangilaq pilersitsiniartup imm. 2-imi taaneqartunik paasissutissanik nalunaaruteqareertinnagu. Imm. 2-imi taaneqartutut pissutsit allannguuteqarpata, paasissutissiisussaataasumut qaammat ataaseq qaangiutsinnagu allannguuteqarneq pillugu nalunaaruteqartoqassaaq.

Aningaasanik nakkutigisanik taarsigassarsianillu nalunaaruteqartarneq

§ 8. Suliffeqarfimminut atatillugu aktianik nakkutigisassanik nalilinnut sillimmasiinermi tigummiaqartoq, ukiut tamaasa akileraaruseriffimmut sillimmasiissutinit aningaasanik nioqquteqarfimmi nalunaarsukkanit aktianit assigisaannillu, iluanaarutitik qaammaatisiutit malillugit ukiup atuuttup siuliini pissarsiarititaasut pillugit nalunaaruteqartassaaq.

Imm. 2. Imm. 1 naapertorlugu nalunaarutit iluanaarutitik tigusaqartunut ataasiakkaanut tamanut paasissutissanik makkunannga imaqqassapput:

- 1) Nalunaaruteqartup kinaaneranik paasinninnissamut pisariaqartut pillugit, saqqummiussineq.
- 2) Iluanaarutitik tigusaqartup kinaaneranik paasissutissat, tamakkua pigineqarnerat naapertorlugu.
- 3) Iluanaarutit ukiup ingerlanerani agguagarsiaritinneqartut annertussusiat.
- 4) Aktiat il.il. iluanaaruteqaataasoq nunami sumi pilersinneqarsimanersoq, aktiat il.il. aningaasanik niuerfimmi nalunaarsugaappat.

Imm. 3. Nalilinnut sillimmasiivimmiititsisoq imm. 1-imi taaneqartutut, nalunaaruteqarnissamut paasissutissiisuteqartussaasumut kinaanini ilisimatitsissutigissavaa, tamatumani inuup normua, GER-nr., CVR-nr. imaluunniit SE-normu, ilanngullugit.

Imm. 4. Imm. 2-mi taaneqartutut aktianit iluanaarummik pissarsisoq, nalunaaruteqarnissamut paasissutissiisuteqartussaasumut kinaanini ilisimatitsissutigissavaa, tamatumani inuup normua, CVR-nr.

imaluunniit SE-nr., ilanngullugit. Tamannali atuutinnilaq iluanaarutininik pissarsisoq piginneqatigiiffinnut tunngasumik inatsisini malittarisassat malillugit piginneqatigiiffimmi peqatigiiffimmiluunniit il.il. agguagarsisitsisumi nalunaarsugaanissaq pisussaangippat.

Imm. 5. Pisariillisaataatillugu paasissutissallu pineqartut akileraarutininik nakkutilliinermut pingaaruteqarpiangikkaangata, akileraaruseriffiup inunnut ataasiakkaanut imaluunniit qassiikkaarlugit paasissutissiisussaataasunut nalunaaruteqarnissamut paasissutissiisussaataaneq imm. 1-imiit 4-mut maleruagassat taaneqartut atuukkunnaartissinnaavai annikinnerulersillugilluunniit.

§ 9. Suliffeqarfimminut atatillugu aktianik nakkutigisassanik nalilinnut sillimmasiivimmi tigummiaqartoq, ukiut tamaasa akileraaruseriffimmut qaammatisiutit malillugit ukiup siuliani paarititaasunit aningaasanik nioqquteqarfimmi nalunaarsukkanit aktianit assigisaannillu nalunaaruteqartassaaq, sillimmasiivimmiititsineq inummumut kiffartuussineruppat.

Imm. 2. Nalunaarutit aktianut ataasiakkaanut tunngasunik paasissutissanik makkunannga imaqaassapput, aktiat suuneri oqaatigalugit:

1) Qaammatisiutit malillugit ukiup naanerani nalimikkut nalingi.

2) Ukiup ingerlanerani aktiamit iluanaarut agguagarsiaritinneqartoq aammalu aktiat nunami sumi pilersitaaneranut paasissutissiissut.

Imm. 3. Suliffeqarfimminut atatillugu aktianik nioqquteqartoq, ukiut tamaasa akileraaruseriffimmut aningaasanik nioqquteqarfimmi nalunaarsugaasunik aktianik il.il. qaammatisiutit malillugit ukiup atuuttuusup siuliani tunisaqarnernik nalunaaruteqartassaaq tunisaqarnerit inummumut kiffartuussineruppata. Nalunaaruteqarneq aktiap suuneranik, qanga tunineqarfianik aammalu aktiap tunineqarnerani nalingitinneqartoq pillugu paasissutissanik imaqaassaaq.

Imm. 4. Nalilinnik sillimmasiivimmiititsisoq tuniniaassunneqartorluunniit, nalunaaruteqarnissamut paasissutissiisussaataasumut kinaanerminik, tamatumani aamma inuttut normuminik ilisimatitsissuteqassaaq.

Imm. 5. Pisariillisaataatillugu paasissutissallu pineqartut akileraarutininik nakkutilliinermut pingaaruteqarpiangikkaangata, akileraaruseriffiup inunnut ataasiakkaanut imaluunniit qassiikkaarlugit paasissutissiisussaataasunut nalunaaruteqarnissamut paasissutissiisussaataaneq imm. 1-imiit 4-mut maleruagassat taaneqartut atuukkunnaartissinnaavai annikinnerulersillugilluunniit.

§ 10. Pisortat karsii, realkreditinstitutsit, pappiaqqanut nalilinnut qitiusumik nalunaarsuiffiit, aktiat tunngavigalugit piginneqatigiiffiit, aningaaseriviit, sparekassit, andelskassit, aningaasaliissuteqarnernut peqatigiiffiit, aningaasanik nioqquteqartut allallu, ernianut allagartanik aningaasannkortitsisartut, obligationinulluunniit tunngasunik ernialiisartut, akileraarusiinermut atugassanik minnerpaamik ukiumut ataasiarlutik namminnerlutik akileraaruseriffimmut ukiup siuliani obligationinik pigisaqartut ataasiakkaat ernianut allagartanik aningaasannkortitaasa ernialiussalluunniit aningaasartaasa amerlassusiinik obligationillu pineqartut taaguutaannik ukiullu pineqartup naanerani nalimikkut nalinginik aammalu paasissutissanik imm. 3-mi 4-imilu taaneqartunik tunniussisassapput.

Imm. 2. Imm. 1-imi taaneqartutut taamatuttaaq aningaasaliinernut peqatigiiffinni aningaasaliinernut uppernarsaatinut tunngatillugu iluanaarutininut allagartanik aningaasannkortitsinerit imaluunniit aningaasaliinernut peqatigiiffinni kontonik ingerlatsiviusuni aningaasaliissutininik pigisassannkortitsinerinik aammalu aningaasaliissutininut uppernarsaatinut kontomik ingerlatsiviusumi aningaasaliinernut peqatigiiffiup taaguutaa, tamatumani suuneri sumullu atortuuneri, ukiullu naanerani nalimikkut nalingi pillugit paasisitsissutigineqassapput. Akileraaruseriffiup aamma aalajangersinnaavaa,

nalunaaruteqarnissamut paasissutissiisussaataasut paasissutissanik akileraaruseriffimmut nalunaaruteqarnissamut pisussaaffiup naammassinninnissamut atugassanik imminnut ilisimateqatigiittassasut. Taamatuttaaq obligationinik, allatamik erniaqartinnagit imaluunniit aningaasarsianit akileraarutit pillugit Inatsisartut inatsisaanni § 18 imm. 3 naapertorlugu, erniasiarititassanut minnerpaaffissarititaasoq ataallugu erniaqartillugit pilersitaasunik tamakkiisumik akiligaqarnerit pillugit paasissutissat tunniunneqassapput.

Imm. 3. Aningaasaliinernut peqatigiiffimmi kontonik ingerlatsisuusumi ilaasortaasoq peqatigiiffiup imm. 1 aamma 2 naapertorlugu ilaasortaasup aningaasaliissutaanut ikisanik nalunaaruteqarnissami atugassanik imaluunniit peqatigiiffiup § 11 naapertorlugu tigusat pillugit peqatigiiffiup nalunaaruteqarnissaani atugassanik, qinnuteqartoqartillugu peqatigiiffiup akileraartarnermut tunngatillugu attuumassuteqartunik tunngavigisat ilaasortaasup isertitanik naatsorsuinermit atugarisai pillugit, tamatumani aamma pineqartup inuuniutigalugu pissarsianit akileraarusigaanersoq nalunaaruteqassaaq.

Imm. 4. Ernianut iluanaarutinulluunnit kuponinik aningaasanngortitsinissamik imaluunniit pappiaqqanik aningaasanik nalilinnik qitiusumik naluaarsuiffimmi kontomik pilersitsinissamik qinnuteqartoq, akileraaruseriffiup ilusissamik aalajangigaa malillugu iluseqartumik aningaasanngortitsiviusoq imaluunniit kontomik ingerlatsiviusumik institutti piginnittuusup kinaaneramik ilisimatitsissuteqassaaq paasissutissallu tunniunneqartut eqqortuuneri uppersarsarlugit. Kuponi aningaasanngortinneqassanngilaq erniallu akilerneqassanatik aningaasanngortitsiffiusoq imaluunniit kontomik ingerlatsiviusumik institutti paasissutissanik taaneqartunik pereertinnagu.

§ 11. Kinaluunniit nuussinermik ingerlatitseqqiilluni akunnermuliuttuusooq imaluunniit pissarsisoq imaluunniit nuussisoq pillugit akunnermuliuttutut taasaaq imm. 3 naapertorlugu akileraaruseriffimmut obligationinik erniasianullu allagartanik, tamatumani aamma obligationinik allassimasumik erniaqartitaanngitsunik imaluunniit erniarititat minnerpaaffissaat ataallugu allaassimasumik erniaqartillugit pilersitaasunik, aningaasarsianit akileraarutit pillugit Inatsisartut inatsisaanni § 18, imm. 3 naapertorlugu, tunniussinernik ilisimatinneqassaaq. Tamanna aamma atuuppoq aningaasaliissutitut uppersarsaatinik taamaattunullu tunngatillugu iluanaarutitut kuponinik tunniussinernut aammalu aningaasanngortitsinernut, tamatumani aamma aningaasanngortitsinernut ataasiakkaanut tunngatillugu piffissaq aningaasanngortitsiffiusoq pillugu, aningaasaliisarnernut peqatigiiffimmi kontomik ingerlatsisuusumi uninngasuutitut, aammalu tigusinerni ataasiakkaani aningaasaliisarnernut peqatigiiffiup aningaasanik nalilinnik pappiaraataasigut iluanaarutitut annaasaqaatinulluunniit piviusunngortitsinerup nalaani sulii piviusunngortitaanngitsortaanut. Akileraaruseriffiup attuumassuteqartut peqataasut § 10, imm. 4-mi taaneqartutut inuup normuanik il.il. paasisitsissuteqarnissamut pisussaafilerneqarsinnaapput.

Imm. 2. Taamatuttaaq imm. 1-mi aalajangersagaq terminimut, pisinermut tunisinermullu tunngasunik isumaqatigiissutitut nuussinernulluunniit atuuppoq, isumaqatigiissuteqartuni illuatungiusut arlaat inuinnaappat.

Imm. 3. Suliffeqarfimminut atatillugu imm. 1 aamma 2-mi taasani pappiaqqanik nalilinnik imaluunniit isumaqatigiissutinik niueruteqarlunilu nuussinermik ingerlatitseqqiilluni akunnermuliuttuusooq, imm. 1 naapertorlugu naalunaaruteqarluni paasissutissiisussaataavaq. Taamatuttaaq aamma atuuppoq kimulluunniit inuutissarsiatigalugu isumaqatigiissutinik taamaattunik suliaqarluni isumaqatigiissusiortartumut imaluunniit nuussinermik ingerlatitseqqiilluni akunnermuliuttuusumut. Kontomik ingerlatsiviusumi aningaasaliinernut peqatigiiffinni kontumit tigusinerit pillugit tamatumani peqatigiiffik nalunaaruteqartussaataavaq. Pappiaqqat nalillit imaluunniit illuatungeriit

isumaqatigiissutaat imm. 1 aamma 2-mi taasat nuunneqartillugit, taakkualu oqaaseqatigiinni siullerni taasatut nalunaaruteqarnikkut paasissutissiisussaatitaanngippata, imaluunniit nalunaaruteqarnikkut paasissutissiisussaatitaasuunngitsumit tamanna pillugu isumaqatigiittoqartillugu aamma nuussinermik ingerlatitseqqiilluni akunnermuliunnikkut isumaqatigiissutinik suliaqartoqartillugu, pappiaqqanik nalilinnik imaluunniit isumaqatigiissummik illuatungiusumit pissarsisuusumit nalunaaruteqarnikkut paasissutissiisussaatitaaneq tassannga pissaaq.

Imm. 4. Pappiaqqanik nalilinnik imaluunniit isumaqatigiissutinik imm. 1 naapertorlugu nuussisoqartillugu imaluunniit isumaqatigiissummik imm. 2 naapertorlugu inuinnarmit imaluunniit inatsisit naapertorlugit inuttut tunngatinneqarsinnaasup akornanni isumaqatigiissusiortoqarsimatillugu Kalaallilu Nunaanni angerlarsimaffeqartuutillugit imaluunniit Kalaallit Nunaanni aalajangersimasumik ingerlatsiveqartumik inuussutissarsiuteqartut (akileraartartut) aamma inuinnarmit imaluunniit inatsisit naapertorlugit inuttut tunngatinneqarsinnaasup nunanit allanit pisup, imm. 3-imi oqaaseqatigiit siulliit naapertorlugit nalunaaruteqarnikkut paasissutissiisussaatitaanngitsuuppat aamma nuussineq akunnermuliuttumit imaluunniit isumaqatigiissut taamatut paasissutissiisussaatitaanngitsumit suliarineqarpat, akileraartup nalunaaruteqarnikkut paasissutissiisussaatitaaneq akisussaaffigivaa.

Imm. 5. Pissarsisoq nuussisorluunniit, nalunaaruteqarnikkut paasissutissiisussaatitaanermik pisussaaffeqarnerminik naammassinninngitsoq, obligationinut il.il. imaluunniit kuponimut attuumassuteqartunik ernianik iluanaarutinillu akileraartussatut isigineqarsinnaavoq.

§ 12. Pissutsit atuuttut tamanna tapersepassuk, paasissutissarlu akileraartarnermi nakkutilliinermut annikinnerusumik pingaaruteqarpat, akileraaruseriffiup obligationinik il.il. piginnittunut ataasiakkaanut qassiikkuutaanulluunniit nalunaaruteqarnikkut paasissutissiisussaatitaanermik pisussaaffeqarneq atorunnaarsissinnaavaa annikinnerulersilluguluunniit.

Pineqaatissiinerit

§ 13. Piaaraluni imaluunniit mianersuaalliorluni § 1, imm. 1, § 2, imm. 1-3-mut aamma 5, § 3, imm. 1 aamma 2, § 4, imm. 1 aamma 2, § 5, imm. 1, 3 aamma 4, § 7, imm. 1 aamma 2, § 8, imm. 1-4-mut, § 9, imm. 1-4-mut, § 10 aamma § 13, imm. 1-4-mut unioqqutitsisoq akilisitaanermik pineqaatissinneqassaaq.

Atuutilerfia

§ 16. Nalunaarut 1. januar 2007 atuutilerpoq

Imm. 2. Ilutigitillugu Aningaaserivinni il.il. ernianit isertitat il.il. akileraarutitut tunngatillugu nakkutigineqarnerat pillugu Namminersornertullutik Oqartussat nalunaarutaat nr. 28, 23. august 1986-imeersoq atorunnaarpoq.

Kalaallit Nunaanni Namminersornerullutik Oqartussat, ulloq 1. december 2006

Josef Motzfeldt

Kaare Hagemann

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut